

摘藻堂四庫全書薈要

集部

欽定四庫全書薈要

集部

誠齋集卷二十四

五

詳校官助教臣謝登雋



欽定四庫全書薈要卷一萬五千六百一

集部

誠齋集卷二十四

宋 楊萬里 撰

詩

朝天集

偶送西歸朝天二集與尤延之蒙惠七言和  
韻以謝之

梁溪歸自鏡湖天筆捲湖光入大篇傾出錦囊和雨濕

炯如柘彈走盤圓許分句法何曾付自笑蕪辭敢浪傳

兩集不須求序引祇將妙語冠陳編

尤丈號梁溪居士  
新歸自朝陵所

西歸累歲却朝天添得囊中六百篇垂棘連城三倍  
價夜光明月十分圓競誇鳳沼詩仙樣當有雞林賈  
客傳我似岑參與高適姓名得入少陵編

右延之詩

跋王順伯所藏歐公集古錄序真蹟

遂初欣遇兩詩伯臨川先生一禪客三人情好元不疎

祇是相逢逢不得渠有負觀碑儂有永和詞真實爭到

底未說妍與姍珊瑚擊得如粉碎趙璧博城翻手悔不

似三家闕斷碑夜半戰酣莫先退皇朝愛碑首歐陽

集古萬卷六一堂玄珪漆玉堆墨寶點霜黑水塗緇裳

臨川無端汲古手席卷歐家都奄有岫山科斗不要論

嶧山野火不經焚尤家沈家喙如鐵未放臨川第一勲

不知臨川何許得尤物集古序篇出真筆遂初心妒口

不言君看跋語猶悵然

遂初欣遇尤延之沈虞卿自號也二公與順伯皆喜收碑刻各

自誇

尚

和趙稷臣惠詩軸

今代宗英政選賢間居江介更同年別來十載長相憶  
新聽千詩喜欲顛爽似月華秋豔豔韻如荷葉夏田田  
吹燈把玩舒還卷老眼惺鬆夜不眠

和段季承左藏惠四絕句

箇箇詩家各築壇一家橫割一江山祇知輕薄唐將晚  
更解攀翻晉以還

遮莫蟠胸書似山更饒落筆語如泉陰何絕倒無人怨  
却怨渠儂秘不傳

道是詩壇萬丈高端能辦却一生勞阿誰不識珠將玉  
若箇關渠風更騷

四詩贈我儘新奇萬象從君聽指麾流水落花春寂寞  
小風澹日燕差池

和張功父梅花十絕句

今歲柴車總未巾孤山龍井不曾行老無半點看花意

遮莫明朝雨及晴

道山堂後數株梅為底偏於雨裏開到得晴來無一朶  
亂飛白雪點蒼苔

不是春光不早回却緣春雪勒踈梅詩人縱有催花手  
有雪堪催花只催

淡淡梅花不要裝真珠樓閣水精鄉騷人詞客猶愁冷  
紫蝶黃蜂更敢忙

東皇歲歲駕蒼龍只許仙妃萬玉從天上冰霜清入骨



人間桃李若為容

約齋句子已清圓更賦梅花分外妍不飲銷金傳玉手  
却來嚙雪聳詩肩

道是梅兄不解琴南枝風雪自成音玉繩低後金盆落  
獨與此君談此心

橫斜影裏惜花殘忘却人間一鼠肝莫怨梅殘看不足  
請君明歲早來看

要與梅花巧闔新恨無詩句敵黃陳約齋詩好人仍好

不怕梅花賽却人

老子年來不願餘  
祇慙霜鬢入金鋪  
故山自有梅千樹  
夢繞橫枝撚斷鬚

去瑞香病葉

紫蕤落盡長青枝  
政是添新換舊時  
辛苦為渠耘病葉  
殷勤挽住是遊絲

和袁起岩郎中投贈七字二首

故人一別兩相思  
不但平生痛飲時  
胸次五三真事業

筆端四六更歌詩閉門覓句今無已刻意傷春古牧之  
卧雪高人家譜在春風政著紫蘭枝

道場山下弄山泉餐菊紉蘭萬物先送眼飛鴻高四海  
補天健筆震三川池塘碧草回春夢衣鉢黃梅肯夜傳  
雨不饒人有新句怨渠未許見全篇

跋袁起岩所藏後湖帖并遺像一軸詩中語  
皆櫟括帖中語也

先生向來落異縣故人十載不相聞歸來不但荒三逕

點檢松菊無一存裏輪加璧豈不好朝廷禮數優遺老  
紅旗黃紙久罷休青山白雲苦死留咫尺西園歸未得  
只待桃花水生半篙碧便拏短艇歸結茅共尋赤松與  
黃石風烟之表非人間別有天地寬且閒周山賣却不  
要錢袁家送酒一破顏猶嫌孤斟太落莫更覓高人共  
杯杓銀鈎四紙墨尚鮮妙處難與俗人言忽逢先生自  
天降手扶太一青藜杖仙容可望不可親飄然飛去青  
霞上白蘋滿棹何時歸秋着蘆花知不知

謝邵子德稱示淳熙聖孝詩

古人浪語筆如椽何人解把筆題天崑崙為筆點海水  
青天借作一張紙作商猗那周皇矣廷尉簿正邵夫子  
淳熙聖孝貫三光題大如天誰敢當夫子一灑金玉章  
銀河吹笙間琳琅吉甫奚斯鴻鴈行彼何人哉唐漫郎  
夜來玉蟲黏金粟老夫春寒眠不足起來拾得聖孝詩  
燈花阿那聖得知

題曾無已所藏高麗足紙蔡君謨歐公筆蹟

三韓玉葉展明蠟諸老銀鈎卷碧鮮幸自不逢文與可  
一竿秋竹掃風烟

夢種菜

予三月一日之夜夢遊故園課僕夫種菜若秋  
冬之交者尚有菊也夢中得菜子菊花一聯覺  
而足之

背秋新理小園荒過雨畦丁破塊忙菜子已抽蝴蝶翅  
菊花猶着鬱金裳從教蘆葍專車大早覺蔓菁撲鼻香

宿酒未銷羹糝熟析醒不用柘為漿

謝曹宗臣惠雙溪集

君不見東陽沈隱侯君不見宣城謝玄暉  
兩處雙溪清徹底二子詩句清於溪千載却有曹夫子  
天借故人作詩地家在東陽寶婺邊  
官在宣城蓮幕裏溪光滴作兩眼明  
溪秀吐作五字清開卷看來掩卷坐詞波  
跳作雙溪聲無人寫作雙溪操收拾新篇  
句中妙莫將沈謝鴻鴈行便與猗那薦清廟

過霸東石橋桐花盡落

老去能逢幾箇春  
今年春事不關人  
紅千紫百何曾夢  
歷尾桐花也作塵

春雨呈袁起岩

昨日晴暄儘十分  
無端寒濕復今晨  
蒼顏華髮差排老  
急雨顛風屏當春  
只有觀書堪遣日  
從來病眼不如人  
詩名滿世真何用  
更賺先生願卜鄰

再和



三月陰晴頃刻分晚來非午午非晨閉門細草新蒲雨  
過眼飛花落絮春顧我江湖釣竿客識君臺閣步雲人  
柯山不患無人作音佐便合留中作近鄰

擬玉水記方流詩

觀水那無術曾於往記求是間還韞玉其外必方流  
縝栗淵潛久英華氣上浮清波皆中矩寶浸直橫秋金海  
芒相貫璿源折以幽端如君子德不病暗中投

擬歸院柳邊迷詩

玉殿朝初退金門馬不嘶院深歸有處柳暗迹都迷紫  
陌春無際青絲舞正齊風烟忘近遠樓閣問高低殘雪  
鶯聲外斜陽鳳掖西少陵花底路物物獻詩題

擬汲古得修綆詩

學子研終古難將短淺求汲深欣得得操綆要修修遠  
酌源千載長縑思萬周初如泉眼隔忽若井花浮意到  
言前達詞於筆下流昌黎感秋句聖處極冥搜

謝張功父送牡丹

病眼看書痛不勝落花千朵喚雙明淺紅醺紫各新樣  
雪白鶯黃非舊名擡舉精神微雨過留連消息嫩寒生  
蠟封水養松窓底未似凋欄倚半醒

張功父送牡丹續送酴醾且示酴醾長篇和  
以謝之

溪桃紅霞作紅雨海棠飄盡春無處約齋錦幄一夜空  
行李移歸雪宮住只道青蚨弱無力飛上朱簷還有翼  
貪看翡翠積成堆忽吐瓊瑤真作劇素影與月相將迎

綠雲和露相扶擎南枝暗香久寂莫此花與梅同一清  
老夫最愛嚼香雪不但解醒仍滌熱牡丹未要煎牛酥  
醪醕相領入冰壺約齊知我春愁重併遣二爻來相娛  
惜無老盆一快舉淡日微風花自舞約齊詩瘦浪作癡  
君不見酒不到劉伶墳上土

和張功父送黃薔薇并酒之韻

海外薔薇水中州未得方旋偷金掌露淺染玉羅裳已  
換桃花骨何須賈氏香更煩麴生輩同訪墨池楊

功父  
詩云

已從槐惜葉  
更與菊為裳

### 和張功父聞子規

久雨今朝忽作晴  
老人懷抱不勝清  
仲宣久作登樓賦  
望帝更吟當殿聲  
春去春來渾是夢  
花開花落若為情  
歸心不用渠催喚  
自有江鷗與狎盟

### 跋范文公與尹師魯帖

帖云承以朝車憇歇南亭未敢拜謁且請與通  
判喫食所事不須與衆云云也當是尹責均州

監酒自均來訪范於南陽時也

佳客千山得得來  
主人雙眼為渠開  
逢人莫說當時事  
且泊南亭把一杯

跋韓魏公與尹師魯帖

帖中語益韓公經畧西事時以書與尹往還多  
謀畫軍事

侍中尺箠撻羗酋更得河南共運籌  
到得降書來北闕  
河南騎馬去均州

跋陳簡齋奏草

詩宗已上少陵壇筆法仍抽逸少關真蹟總歸天上去  
獨留奏草在人間

又跋簡齋與夫人帖

帖云平江尚留兩日書中說錢盡再遣四尊

家在錢塘身在蘇戾戾消息近來踈極知薪水無錢買  
且遣長鬚送乘壺

丘母太碩人臧氏輓詩

丘宗師之母

行樂潘慈母榮封衛碩人金花五色詔雨葉六番春白  
露凋萱慘青山拱木新九齡真上壽一子更名臣

共伯松楸後宗文玉雪初吹燈躬夜績聽子讀殘書帥  
閩方蘭膳王畿又版輿藥成人不見月裏踏蟾蜍

劉平甫輓詩

忠孝元家法經綸豈懶心日邊遲信息霞外且山林風  
月詩天巧乾坤酒陸沉一生欠半面五字寄哀音

忠顯肩雙廟屏山錄二程嶺寒松節苦壇暖杏花明君



也孤傳業天平獨短生子孫無一物故紙付渠畊

江西道院集

戊申四月九日得請補外初出國門宿釋迦  
寺

出却金宮入梵宮翠微綠霧染衣濃三年不識西湖月  
一夜初聞南澗鐘藏室蓬山真昨戲園翁溪爻得今從  
若非朝士相追送何處冥鴻更有蹤

題南屏山興教寺清曠樓贈釋訥律師

清曠樓中夕眺間落暉殘雨兩生寒樓中占盡南山了  
更占西湖與北山

明發南屏

新晴在在野花香過雨迢迢沙路長兩度立朝今結局  
一生行客老還鄉猶嫌數騎傳書札剩喜千山入肺腸  
到得前頭上船處笑將白髮照滄浪

過南蕩

袂纔束髮幼相依麥已掀髯喜可知笑殺槿籬能耐事

東扶西倒野醪醪

近岫遙峯翠作圍  
平田小港碧行遲  
垂楊一徑深深去  
阿那人家住得奇

政好行時莫嬾行  
猶寒未熟雨初晴  
江西休問何時到  
已離南屏第一程

過楊村

石橋兩畔好人烟  
匹侶諸村別一川  
楊柳陰中新酒店  
蒲萄架底小漁船  
紅紅白白花臨水  
碧碧黃黃麥際天

政爾清和還在道為誰辛苦不歸田

側溪解纜

夢裏喧聲定不凡順風解纜破晴嵐  
起來職事惟洗面此外功名是挂帆  
莫笑一蔬兼半菽飽餐萬壑與千岩  
蓬萊雲氣君休望且向嚴灘濯布衫

洗面絕句

浙山兩岸送歸艍新擣春藍淺染蒼  
自汲江波供盥漱清晨滿面落花香

# 舟過桐廬

瀟灑桐廬縣寒江繚一灣  
朱樓隔綠柳白塔映青山  
稚子排窻出舟人買菜還  
峯頭好亭子不得一躋攀

近縣人人喜來船  
岸岸移偶因小泊處恰是早餐時  
喚僕答相亂看山寒不知橫洲猶半在  
今歲水生遲  
後面山無數南頭柳更多  
人家逼江岸屋柱入滄波  
老去頻經此重來更幾何  
牛山動悲感曾侍板輿過

## 溜港灘

此去嚴州只半程一江分作兩江橫忽驚洲背青山下  
却有帆檣地上行

午睡聞子規

睡眼鬢鬆未爽時一聲杜宇頓開眉不須報道思歸樂  
今我真歸不用思

已過胥口將近釣臺

睡起衣襟亂頭巾百摺痕帆端風色緊船底水聲喧胥  
口寬餘浪嚴灘釣處村因行還訪古故老莫能言

釣臺

釣石三千丈將何作釣絲肯離山水窟去作帝王師小  
范真同味玄英也並祠老夫歸已晚莫遣客星知

蘭溪女兒浦曉寒

前年寒早熟亦早去年寒遲熟亦遲何曾寒暑有遲速  
通融三年那兌支人生何必早得意芍藥榮時牡丹瘁  
榮枯遲速一笑休順風今日好行舟

橫山塔

相識橫山塔于今十五年孤標立絕頂禿影照晴川寂  
寞無香火將迎幾舫船吾衰豈重過珍重壻中仙

舟過蘭溪

駕雨顛風過即虛殺風急雨有還無雲山奔走無停住  
岸樹歌斜不要扶船底石聲知淺水沙頭笠影倦牽夫  
金臺祇在橫山背便到金臺也日晡

嘲穉子

雨裏船中不自由無愁穉子亦成愁看渠坐睡何曾醒



及至教眠却掉頭

雨中遣悶

船篷深閉膝難安  
四面千峯不得看  
莫厭霏微悶人雨  
插秧怕熱愛輕寒

橫山江岸

近船古岸不勝高  
浪劃濤剗似削刀  
層石層沙層膩土  
僧厨蒸出栗黃糕

舟中午睡

一葉搖無定昏然妙思通化為漆園蝶飛入大槐宮有  
酒相勾引無茶作寇戎平生眠不足還債鶻聲中

炙蒸餅

圓瑩僧何矮清鬆絮爾輕削成瓊葉片嚼作雪花聲炙  
手三家市焦頭五鼎烹老夫饑欲死汝輩且同行

睡起觀山

過雨前汀未可登  
寒蓬小散睡  
曾騰船頭政好看  
山色一點江風冷似冰

柴步灘

江闊水不聚，分為三五灘。遂令客子舟上灘，一一難小。  
沙已成洲，大洲已成山。山有樹百尺，樹圍屋數間。水底  
復生洲，沙濕猶未乾。從此洲愈多，安得水更寬。憶從嚴  
陵歸，水落不能湍。拖以數童僕，折却十竹竿。今茲過吾  
舟，念昔猶膽寒。

東磧灘

江船初上灘，灘水政勃怒。船工與水鬪，水力攔船住。疏

璃忽破碎冰雪迸吞吐竟令水柔伏低頭船底去朝來  
發盈川已過灘十許但聞浪喧闐未覩水態度却緣看  
後船偶爾見奇處從此至三衢猶有灘四五

將至地黃灘

未到地黃灘十里先聞聲檣竿已震掉未敢與渠爭舟  
人各整篙有如大敵臨塞蓬試一望濺雪紛淙琤乃是  
水碓港為灘作先鳴真灘定若何老夫虛作驚

蘇木灘

灘雪清濺眸灘雷怒醒耳落洪翠壁立跳波碧山起船  
進若戰勝船退亦遊戲若非篙師苦進退皆可喜忽逢  
下灘舟掀舞快雲駛何曾費一棹纔瞬已數里會有上  
灘時得意君勿恃

遼車灘

東岸上不得西岸上更難五船往復來經緯灘兩間一  
船初徑進當流為衆先濤頭打澎湃退縮不敢干一船  
作後殿忽焉突而前瞬息越湍險回顧有矜顏老夫與

寓目亦為一粲然

舟中新暑止酒

新暑酒不宜作熱妨夜睡不如看人飲亦自有醉意彼  
飲吾為燕所美過於味同舟笑吾癡吾不羨渠醉安知  
醉與醒誰似誰不似

過查瀨

眼底常山一武中上灘更得半帆風青天以水為銅鏡  
白鷺前身是釣翁舊日岸頭渾改盡數尖山背忽攬空

老夫只費五六日行盡浙山西復東

舟過大水旁羅灘渴甚小飲

熟水無多喫烹茶未要來從教十分渴連掃雨三杯岸

樹背船走江波閃日開靈山定能飲分酌碧蓮醅

信州酒名

碧蓮

堂

過鉛山江口

下却諸灘水漸平舟行已遠上饒城酒家便有江鄉景

綠柳梢頭挂玉瓶

過弋陽觀競渡

急鼓繁鉦動地呼  
碧琉璃上兩龍趨  
一聲翻倒馮夷國  
千載淒涼楚大夫  
銀碗錦標誇勝捷  
畫橈綉臂照江湖  
三年端午真虛過  
竒觀初逢慰道塗

靈山

饒水回回轉靈山  
面面逢展成青步  
障斂作碧芙蓉  
變態百千樣尖新  
三兩峯遠看方更  
好還隔翠雲重

龜峰



明發大琛山龜峯引領來對面亭午過弋陽龜峯縮頭  
不相見綠毛蒙茸淨如染紫殼輪囷有斑點不知七十  
二鑽神不神桃花市裏看最真

五月一日過貴溪舟中苦熱

半月陰涼天氣佳今朝新暑不饒些一生怕熱長逢熱  
千里還家未到家入却船來那得出恰方日午幾時斜  
勸君莫愛高官職行路難時却怨嗟

初二日苦熱

人言長江無六月我言六月無長江只今五月已如許  
六月更來何可當船倉周圍各五尺且道此中底寬窄  
上下東西與南北一面是水五面日日光煮水復成湯  
此外何處能清涼掀篷更無風半點揮扇只有汗如漿  
吾曹避暑自無處飛蠅投吾求避暑吾不解飛且此佳  
飛蠅解飛不飛去

端午前一日阻風鄱陽湖觀競渡

惡風夜半阻歸船端欲留人作勝緣千里攜家觀競渡

五湖新漲政黏天，棹翻波浪山如雪。  
醉殺兒郎喜欲顛，得去更佳留亦好。  
吾曹何處不欣然。

初六日過鄱陽湖入相見灣

阻風兩日卸高桅，笑傲江妃縱酒杯。  
及至絕湖纔一瞬，翻令病眼不雙開。  
蘆洲荻港何時了，南浦西山不肯來。  
相見灣中悶人死，一灣九步十縈迴。

過趙家莊

老子方孤悶，西山忽在旁。  
回頭鄔子若明眼，趙家莊試

飲章江味中涵吉水香望鄉儂已喜而況到吾鄉

十五日明發石口遇順風

汴流淺水刺樓船百棹千篙祇不前一夜波聲喧到曉  
北風氣力欲翻天挂帆未了青泥過轉眼相將玉筍邊  
無數小舟俱在後追儂不及指為仙

山居午睡起弄花

五年出仕喜還家雙桂成陰不闕些午睡起來無理會  
銀盆清水弄荷花

數片荷花漾水盆忽然相聚忽然分從教塵捺沉盆底  
依舊浮來無水痕

浸得荷花水一盆將來洗面漱牙根涼生鬚髻香生頰  
沉麝龍涎却是村

賀必遠叔四月八日洗兒

年年四月初八日水沉湯浴黃金佛今年大阮當此時  
真珠水洗白玉兒吾家英傑相間起胄出關西老夫子  
公家宣和中大夫大江之西推名儒六十年來誰繼渠

願兒長成讀祖書再起門戶光鄉閭

七月二十三日南極老人星歌上叔父十三  
致政一杯千歲之壽

浹溪居士登九齡朱顏青鬢如後生橫拖仙人綠玉杖  
倒誦上帝黃庭經璇霄仙籍書姓名丹霞紫誥金花綾  
近來更覺雙眼明夜抄蠅頭窓下燈登山臨水兩腳輕  
御風騎氣不用行何人有筆筆無塵鴛溪一幅為寫真  
烏紗白苧坐鼓琴上有千歲長松青令威旁舞玄天聽

箇是活底南極老人星

秋暑

夏暑減未曾秋暑增愈劇老翁避無處茅齋聊憇息銀  
盆滿注水銀水同一色中涵雙桂影倒卧一天碧清光湛  
不動欲弄還復惜偶然一播灑樹影碎相激洗面涼  
已滋漱齒痛仍逼平生畏秋暑老去畏彌極

讀漢書二首

猿臂生何晚彫蟲死較遲晚生妨底事遲死獨堪悲

乃祖寬仍豁曾孫察作明不將囊底智分減及元成

誠齋集卷二十四



欽定四庫全書薈要卷一萬五千六百二

集部

誠齋集卷二十五

宋 楊萬里 撰

詩

江西道院集

送吉州太守朱子淵造朝

廬陵難做定何如  
請看黥川朱大夫  
秋月滿懷春滿面  
視民如子吏如奴  
萬艘白粲何曾欠  
百雉金城舊更無

歸侍玉皇香案下甘棠便是瑞蓮圖

郡中三瑞堂前生數枝雙頭蓮子淵

畫為

圖

公在鄉邦我在京百書終不慰生平西歸一見還傾蓋  
夜坐相看話短檠老去可堪頻送客古來作惡是離情  
雲泥隔斷從今始肯倩征鴻訪死生

感秋五首

昨扇猶午攜今裳覺晨單起來且復卧未敢窺柴闥不  
知病至此為復老使然平生性剛燥畏熱長喜寒念昔

忝鄉賦踐雪詣春官布褐背不續芒鞋繭且穿長亭夜  
濯足吹燈呻故編買酒破孤悶浩歌毀屋椽何曾悲凜  
秋山稜聳臞肩秋風吹我髓秋露滴我肝我欲與秋敵  
秋先令我酸歎息復歎息誰是長少年

盥漱已云畢危坐正冠衣覽鏡忽見我不識我為誰自  
倚身尚強不悟年已衰舉頭視嘉木向人慘無姿我欲  
訴渠老渠乃懷秋悲木悲不解飲瑟瑟聲怨咨我且呼  
麴生細細斟酌之我醉不知我更知春秋為

墮照趣夕黯孤燈啟宵明老夫倦欲睡似醉復如醒寸  
心無寸恨坦如江海清秋蛩何為者四面作怨聲淒惻  
竟未已抑揚殊不平切切百千話遞遞三四更遶砌尋  
不得靜坐復爭鳴有口汝自苦我醉不汝聽

秋曉寒可忍秋夕永難度青燈照書冊兩眼如隔霧掩  
卷却孤坐塊然與誰語倒卧卧不得起行行無處屋角  
忽生明山月到庭戶似憐幽獨人深夜約清晤我吟月  
解聽月轉我亦步何必更讀書且與月聯句

平生畏長夏一念願清秋如何遇秋至不喜却成愁書  
冊秋可讀詩句秋可搜永夜宜痛飲曠野宜遠遊江南  
萬山川一夕八寸眸請辦雙行纏何處無一丘

寄題蕭民望齊雲樓

下泳山尖碧雲起添得奇峰三四觔老人登樓來看雲  
下瞰雲端在平地急呼雲師令執鞭我欲乘此追羣仙  
蓬萊閭風徧遊覽歸來落月滿晴川

寄題李俊臣南樓

庾家南樓天下無李家南樓何似渠玉簪碧山羅帶水  
眼界風烟且千里何須橫陳鸚鵡洲月挂欄干西角頭  
謫仙子孫五鳳手安得長江化作一杯酒

送劉子思往衡湘

浩齋先生第一孫秀峯後進第一人向來著論三分國  
喚起阿瞞戮姦魄有司手持金粟尺越羅蜀錦遺道側  
洞庭昨夜起霜風翩然欲登石廩與祝融歸來定有驚  
人句肯寄江西道院翁

夢作礪試館中所遺建茶絕句

天上蓬山新水芽  
羣仙遠寄野人家  
坐看寶帶黃金鈎  
吹作春風白雪花

寄題安福彭文昌春風樓

沂水何人解問津  
樓中蠹簡拂蛛塵  
杏花壇下朱絃瑟  
十指風生別是春

不到安城二十年  
故人相憶兩依然  
彭家樓上春風裏  
夢倚危欄俯百川

將赴高安出吉水報謁縣官歸宿五峰寺

風暄雨暖日和柔道是穠春不道秋楚楚江楓新結束  
柿紅衫子錦纏頭

野寺重來記昨遊一彈指頃幾經秋五峯絕頂雙松樹  
相識兒時到白頭

明發五峯寺

歸時路何近去時路何遠山路無短長人心有往返  
母因赴官期一出謁鄉縣若非人事牽無奈老自嬾初心



作此行夜雨醒醉眼孤愁念羣騶尺泥滑雙趺首塗天  
全濕回轍雲半捲投寺借松牀呼僧同野飯頽然佳眠  
足得此行役倦暫勞新不堪遐征舊所歎松菊豈不懷  
樊籠何時免瘦藤要覓閒到了古道院

初入筠州界高岡鋪

千尺霜松夾道周國初涼繖至今留筠州舊是朝天路

六十年來得信州

路人號夾道  
松為涼繖樹

贈別羅時清

四歲相從亦快哉東遊興盡却西回詩中風月無疆界  
聖處宮庭元洞開握手論文兩淒斷登山臨水重徘徊  
亦山亭下梅花徑明日先生獨自來

己酉上元後贈劉子才

書臺城西幽絕處古木排霄草荒路空齋深夜四無人  
維予二人聽春雨我如病鶴子茁蘭長幼不同同少年  
聞子誦書金應玉看子落筆山飛泉別來幾何如昨日  
我老過前子非昔來年累硯試集英側耳臚傳第一聲

二月十一日夜夢作東都蚤春絕句

道是春來蚤如何未見春小桃三四點偏報有情人

和尤延之見戲觸藩之韻以寄之

儂愛山行君水遊尊前風味獨宜秋文戈却日玉無價

器寶羅胸金欲流欬唾清園談者詘詩章精悍古人羞

子房莫笑身三尺會看功成自擇留

延之戲誠齋為羊  
誠齋戲尤為蜂螭

郡圃上巳

旋收雨夕放晴

一作清

晨禊日風光正可人間白參紅方

是錦踈桃散李不成春

尋春不見只思還却在蓬萊小崦間映出一川桃李好  
只消外面矮青山

看小舟除萍

花伴吟哦柳伴行生憎庭外晚衙聲獨攜便面巡荷沼  
自課蘭舟掠水萍

歲歲荷花苦未多綠萍蓋水礙新荷請君六月重來看  
雲錦千機不把梭

讀退之李花詩

桃李歲歲同時並開而退之有花不見桃惟見  
李之句殊不可解因晚登碧落堂望隔江桃李  
桃皆暗而李獨明乃悟其妙蓋炫晝縞夜云

近紅暮看失燕支遠白宵明雪色奇花不見桃惟見李  
一生不曉退之詩

郡圃曉步因登披仙閣

昨來風日較暄些破曉來遊特地佳也自低頭花下過

依前撞落一頭花

李花半落雪成堆  
末後桃花陸續開  
白錦地衣紅錦障  
侵晨供張等儂來

五百佳時更絕晨  
園丁猶未放遊人  
瘦藤柱上披仙閣  
四面花光照殺春

只道春來不見痕  
風邀雨勒未忻人  
暄雲淑日消多少  
花柳匆匆了却春

嘲報春花

嫩黃老碧已多時  
駢紫癡紅略放枝始去聲  
有報春三兩  
朶春深猶自不曾知

垂絲海棠盛開

垂絲別得一風光  
誰道全輸蜀海棠  
風攬玉皇紅世界  
日烘青帝紫衣裳  
嬾無氣力仍春醉  
睡起精神欲曉粧  
舉似老夫新句子  
看渠桃杏敢承當

酴醾初發

一春長是怨春遲  
過却春光總不知  
已負海棠桃李了

再三莫更負酴醾

荷亭倚欄

魚跳龜戲不曾閒  
萍盡荷生尚未繁  
水面圓紋亂相入  
玻璃盆旋玉連環

披仙閣上觀酴醾

仰架遙看時見些  
登樓下瞰脫然佳  
酴醾蝴蝶渾無辨  
飛去方知不是花

酴醾約我早來看  
及至來看花已殘  
動地寒風君莫怯



亂吹香雪灑欄干

亦山亭前梅子

道傍小樹復低枝  
摘盡青梅肯更遺  
偶爾葉間留一箇  
且看漏眼幾多時

塹荷池水

雨中來看塹池塘  
自與畦丁細校量  
更放水痕高幾許  
浮荷猶剩若干長

初夏玉井亭晚立

冶藥嬌花一雨空鮮晴新漲未虧儂竹兼樹影眠天底  
人凭欄杆立鏡中看盡水衣投北岸方知今日是南風  
黃鸝對語無尋處忽見雙飛入別叢

送曾無逸入為掌故

吉文江水走玉虹我家水西君水東有時相思即命駕  
連牀夜雨聽松風中間薄宦各分散南飛駕鵝北飛鴈  
朝來驛騎打譙門有客有客來相見聞君攜家入帝京  
椎鼓發船天上行也能枉轍九十里來訪江西道院僧

詩家兩仙宿臺省紅藥蒼苔紫薇影若問山僧作麼生  
日晏鶯啼眠不醒

觀荷上雨

細雨霑荷散玉塵聚成顆顆小珠新跳來跳去還收去  
却是瓊拌弄水銀

筠菴

故老談李仙昔日上寥廓隨身無長物止跨一隻鶴鶴  
本非胎生古卵尚遺殼千年石似堅覆在鳳山脚寒宵

晦風雨神光照岩壑犬吠雞夜鳴龍泣人寢愕祇今筠  
菴是因物非繩削當時范破處作門不關鑰蓋以一把  
茅聊以護霜電遐瞻如釣翁蓑衣逐層著我來驗幽討  
意尚疑俗謔霧中披羽衣砌下脫芒屨入戶環仰觀中  
空生響諾不見朱頂雛猶存雪色膜松梢雙老鶴戛然  
下簷角老夫忽心驚不敢小盤礴

晚步

清水芙蓉未肯開暑天花草底差排鹿葱金鳳何為者

也得園亭護兩堦

翠樾亭前鶯巢

仰聽金衣語偶窺鶯婦巢  
深穿喬木裏危挂弱枝梢  
啄菹雙雙子經營寸寸茅  
何時離脫殼新哢響交交

新暑追涼

去歲衝炎橫大江今年度暑卧筠陽  
滿園無數好亭子一夏不知何許涼  
待等老夫親勘當更招幽鳥細商量  
朝慵午倦誰相伴猫枕桃笙苦竹牀

書孫公談圃談圃載子由為黃白術將舉火  
一猫據爐而溺須臾不見

少許丹砂和水銀鍊成紫磨賺癡人  
賴濱莫笑狸奴著却恐狸奴笑賴濱

無訟堂觀簷間蛛絲

蜘蛛作網祇愁疎密了還遭小雨餘漏却飛蟲  
渾細事無妨網得萬真珠

黃世成挽辭

文行高無對功名莫動渠寧登逸民傳不著茂陵書誰  
謂風流盡猶疑信息疎九京何所憾玉樹滿庭除

筠菴午憇

筠菴稍不至一至一回好風從林梢落吹亂竹根草巾  
履上下涼鶯鵲左右噪市聲元不近靜聽遠亦到石磴  
坐來溫蘚徑淨如掃書空作愁字已忘偏旁了猶自忘  
了愁而況記得老客來談世事欲笑還嬾笑

玉井亭觀荷花

萼仙初出波照日穉猶怯密排碧羅蓋低護紅玉頰館  
之水精宮環以琉璃堞珠明浮盤戲酒漾流杯曄青筆  
尖欲試綠箋敲還摺老龜大於錢辛勤上團葉忽聞人  
履聲入水一何捷

碧落堂暮景輓轡體

碧落堂中夕眺餘一聲哀角裂晴虛滿城烟靄忽然合  
隔水人家恰似無坐看荷山沉半脊急歸道院了殘書  
意行花底尋燈處失脚偏嗔小吏扶



金鳳花

細看金鳳小花鼓費盡司花染作工雪色白邊袍更紫  
且饒深淺四般紅

雨過郡圃行散

劍池一日百週遭雨後閒來照鬢毛  
主管園林鶯稱意  
巡行荷芰鷺宣勞不須見我還飛去  
便與移文告汝曹  
一事惱人無問處南山高是北山高

閏五月十四日因哭小孫子蓬孫歸志浩然

憲孫哭了哭蓬孫老眼元枯也濕巾名宦何須深挿脚  
山林從此早抽身禍無避處唯辭福命不如渠強學人  
吟了此詩還毀了莫令一讀一傷神

憲蓬二  
孫小字

感興

去國還家一歲陰鳳山錦水更登臨別來蠻觸幾百戰  
險盡山川多少心何似閒人無藉在不妨冷眼看昇沉  
荷花正鬧蓮蓬嫩月下松醪且滿斟

後圃散策

花徑雨後涼樹聲風外戰杖屨頓輕鬆兒女同行散少  
者前已失老者後仍倦隔林吹笑語相聞如對面明明  
去人近眇眇彌步遠松杉滿地影一瞬忽不見仰觀紫  
日輪偶度白雲片佳處留再來前山未須徧

筠菴晚睡

碧玉新篁翳洞天斜珉萬斛貯山泉脫巾赤腳長松下  
何處人間更有仙

一戶元無白板遮雨窓新染藕絲紗竹床品字排三隻

睡殺山風醉殺霞

享了荷花一番

上聲

香却穿竹徑百弓長滿園亭榭都參

遍祇有筠菴第一涼

觀迎神小兒社

花帽鉢來重綃裳水樣秋強行終較嬾妍唱却成羞鸚  
鵡棲葱指芙蓉載錦舟休看小兒社只益老人愁

寄奉新鍾宰

傳語請心閣欣逢詩主人鶯花無恙否風月一番新舊

日行吟處今來跡已陳  
應憐楊縣尹鬚髮雨如銀

雨後曉登碧落堂

清晨上碧落親手啓後戶  
斜東見西山粹碧無纖霧  
須臾半崦間冉冉動微絮  
吹作千峰雲立變萬姿度  
正北尋來山遙隔一片雨  
亭亭如仙子曉起澣月露天衣  
異人世一色製輕素  
兩山誰不奇裴回未能去

玉井亭觀白蓮

紅芙蕖雜白芙蕖  
紅底終稠白底疎  
速折當頭一蓮葉

莫令遮却雪肌膚

白蓮出水是青蓮昨日微舒帶酒顏  
踏月來看開盡了露華新洗玉杯寒

新秋晚酌

胡床東向坐秋風忽淒其老夫衰病骨  
急令閉東扉西扉亦半掩厭風作東吹  
何必風及我風入涼自馳晚蟬見誰說  
我飲渠便知飛從何方來徑集庭樹枝  
三嘆復九詠話盡新秋悲我老悲已忘  
汝語復為誰老鳥啼一

聲不知蟬所之

碧落堂曉望荷山

荷山非不高城裏自不見一登碧落堂山色正對面如  
人卧平地躍起立天半指揮出伏兵萬騎橫隔岸後乘  
來未已前驅膽已遠晨光到岩壑人物俱徭絢綠屏紛  
開闔翠旗閃舒卷安得垂天虹橋虛度雲巘老鈴偶報  
事郡庭集賓贊忽忽換山中默默下林坂

午憩筠庵

筠菴偶坐處適當樹闕間遠山不見我而我見遠山清  
風隔江來宛轉入松關翠蕉自搖扇白羽得暫閒可憐  
三竹床睡徧復循環秋暑自秋暑山寒自山寒小吟聊  
適意好惡不必刪

題無訟堂屏上袁安卧雪圖

雲窻避三伏竹床橫一丈退食急袒跣病身聊偃仰有  
夢元無夢似想亦非想滿堂變冥晦寒陰起森爽門外  
日如焚屏間雪如掌蕭然聳毛髮皎若照襟幌拔地排



瑤松倚天立銀嶂遙見幽人廬茅棟歷欲響有客叩柴  
門高軒隘村巷剥啄久不聞徙倚覺深悵幽人寐政熟  
何知有令長誰作卧雪圖我得洗炎瘴

七月十日大雨曉霽登碧落堂

青天送歸雲整如勞還師顏行有喜色廝役爭奔隨晨  
曦映疎雨寶燈貫銀絲落面何曾濕灑空不勝微老夫  
銳登山半嶺驚欲歸仰視得竒觀徙倚為久之誰言李  
成巧此畫天下稀却登碧落堂四面天風吹葛製忍秋

寒前夕酷暑時

微雨玉井亭觀荷

猛雨打萬荷，怒聲戰秋輦。水銀忽成泓，一瀉無復遺。不  
如微雨來，翠盤萬珠璣。荷翻珠不落，細響密更稀。清如  
雪，觸窓三更夢迴時。語君君不見，對景當自知。

碧落堂晚望

暮笳聲裏暮雲生，白白非烟覆一城。祇有青林遮不得，  
兜羅錦上綠琴橫。

觀書

書冊不可逢逢得放不得看得眼昏花放了還太息掩  
卷味方深豈問忘與憶是身何曾動忽然超八極祇言  
半窓間不是華胥國

中元日曉登碧落堂望南北山二首

節裏少公事底忙起侵晨望秋怯殘暑及此東未暇登  
山俯平野萬壑皆白雲身在白雲上不知雲繞身  
米山不知重近見三兩疊遠者淡不真眇與天相接晨

光染紅雲正向山外貼映出青萬層還與雲俱滅

答陸務觀佛祖道院之戲

老禪分得破叢林薄供微齋也不曾道院勅差權院事  
筠菴身是住菴僧人間赤日方如火松下清風獨似冰  
別有暮春沂水在為君一滴灑千燈

寄中洲茶與尤延之延之有詩再寄黃蘗茶  
仍和其韻

詩人可笑信虛名擊節茶芽意不輕爾許中洲真後輩

與君顧渚敢連衡山中寄去無多子天上歸來太瘦生  
更送玉塵澆錫水為披孔思攪周情

延之寄詩覓道院集遣騎送呈和韻謝之

與君髣髴總星星詩句輸君老更成別去多時頻夢見  
夜來一雨又秋生故人金石情猶在贈我瓊琚雪似清  
誰把尤楊語同日不教李杜獨齊名

祇承召還京題江西道院

病身祇要早投閒乞得高安政小安山水秋來渾是畫

樓臺高處自生寒登臨未足還辭去老大重來畢竟難  
碧落翠微好將息清風明月夢中看

郡園鳳山佳處有  
碧落堂翠微亭

問塗有日戲題郡圃

今年郡圃放遊人懊惱遊人作撻春到得老夫來散策  
亂吹花片總成塵商量歲後牢關鎖拘管風光屬病身  
造物嗔儂先遣去遣儂儂去不須嗔

辭棲真室蓋晉仙人李八百故居之址中有  
遺像云

李真宅子故依然道院西偏古洞前一日身遊八百里  
三番花落九千年劍池丹井俱蒼蘚絳節霓旌已碧天  
借問飛仙那用步步行猶是地行仙

留題筠菴以菴室用茅蓋層出如蓑衣然

茂林修竹翠光中那得披蓑一老翁白石砌成珠子徑  
黃茆裹却水晶宮夏涼冬暖非人境雪打霜封即釣篷  
老子明朝便東去更攜瓦枕享松風

留題碧落堂

仙人白日上青冥千載如聞月下笙南北萬山俱在下  
中間一水獨穿城江西箇是絕奇處天下幾多虛得名  
滕閣孤臺非不好祇緣猶帶市朝聲

明發道經生米市隨喜西林寺留題進退格  
貪睡能無起挑燈強未殘春聲忙野店月色淡柴門又  
踏黃塵路前追紅葉村秋衣那敢薄病骨自難溫  
自生米小路出舞陽渡

獨徑千盤繞水田初逢官路一欣然舞陽渡口新河水



白髮重來二十季

義娥謠

中秋夜宿辟邪市詰朝早起曉星已上日欲出  
而月未落光景萬變蓋天下奇觀也作義娥謠  
以記之

羲和夢破欲啟行紫金畢逋啼一聲聲從天上落人世  
千村萬落雞爭鳴素娥西征未歸去簸弄銀盤浣風露  
一丸玉彈東飛來打落桂林雪毛兔誰將紅錦幕半天

赤光絳氣貫山川  
湏臾却駕丹砂轂  
推上寒空碾蒼玉  
詩翁已行十里強  
羲和早起道無雙

小憩玉坊鎮新店進退格

下轎逢新店排門得小軒  
中間一棐几相對兩蒲團  
椽竹青留節簷茅白帶根  
明窓有遺恨接處紙痕班

過羅溪南望撫州泉嶺

泉嶺諸峯太劣生  
與儂爭走學儂行  
蒼蒼總上山頭去  
一色前驅妮翠旌

羅溪望夫嶺

小憩村店問嶺名云望夫七娘歲旱禱雨必應  
藁砧不寄大刀頭化作峰頭石也愁豈有心情管風雨  
向人彈淚繞天流

行役家家寄刀尺誰將枯骨帶心頭惟有望夫心志苦  
甘霖偏為七娘流

題羅溪李店

棟宇整齊窓戶明一峯對面一江橫下程長是無佳店

佳店偏當未下程

誰道村郊野呼侵柴扉竹榻草花清行行且止成佳夢  
不減崔張驚夢身

羅溪道中

每歲秋猶熱今年閏故涼松篁青有數山遠碧無常陣  
陣金風細家家玉粒香祇言官路短堠子暗添長

誠齋集卷二十五

謹案卷二十四第九頁前三行未似瑯欄倚半醒  
原本醒訛醒據宋詩鈔改

卷二十五第四頁後八行無奈老自嬾按宋詩鈔  
自作身





總校官庶吉士臣張能照

校對官庶吉士臣陳大樞

謄錄監生臣周燮

欽定四庫全書薈要

集部

誠齋集卷二十六

八

詳校官助教臣謝登雋





欽定四庫全書薈要卷一萬五千六百三

集部

誠齋集卷二十六

宋 楊萬里 撰

詩

江西道院集

戲贈江干蘆花

避世水雲國卜鄰鷗鷺家  
風前揮玉塵霜後幻楊花  
骨相緣詩瘦秋聲訴月華  
欲招蘆處士歸共老生涯

詠十里塘姜店水亭前竹林

一見此君面荒村不是村  
斜陽與可筆棲雀子猷  
魂客思方無那詩愁得共  
論問渠能飲否把酒酌霜  
根

題姜店水亭子

簾拂雲間竹窻搖水下天  
攔杆斜倚處風物正淒然  
送眼看羣叟收罾得小鮮  
可憐碧玉沼不種一枝蓮

待家釀未至且買姜店村酒

奔走人都倦擔藥酒未來  
那能待竹葉隨喜喚茅柴  
蘆

飯仍多煮菴摩帶淺煨深村市無肉草草兩三杯

十里塘觀魚

予晚宿十里塘姜店見漁者紛集勞而無獲蓋  
塘主已盡其利因不禁漁者故也嘲以絕句

銀塘打盡萬銀梭岸上簦簪來正多船載月明猶有月  
無船無月欲如何

再觀十里塘捕魚有歎

漁者都星散那知不是真忽然重舉網何許有逃鱗暗

漉泥中玉光跳日下銀江湖無避處而况埜塘濱

題十里塘夜景

物色當秋半登臨更夜闌山光倒眠水水影上搖山宿  
鷺都飛去漁人獨未還老夫與明月分割一清灣

南望閤阜山

予去歲歸舟至豫章即望見閤阜山今月十四  
日曉過登米渡復見此山自此日見之愈遠愈  
見十七日未至進賢縣五里所乃不見

慙愧多情閭阜山去年迎我上西船  
今來送我還東去四日相隨到進賢

晨炊熊家莊

朝飢一眼望炊烟繞盡長溪過盡山  
承露絲囊世無樣蜘蛛偷得掛籬間

道傍小松

小松如小兒能坐未能立亂髮覆地皮  
勁氣排雪汁誰將救暍手種此青戢戢  
秋陽暴行人清蔭何時及

行役自歎

去年丐西歸謂可休餘生今年復東下駕言入神京卧  
治方小安趨召豈不榮何如還家樂醉吟聽溪聲  
百年幾暄涼再歲三征行却羨路旁叟白首不到城人  
生如風花去來能與爭且隨風吹起會當風自停

山店松聲

脩塗殘暑僕夫勞午憩茅簷尺許高忽有涼風颭然起  
小松呼舞大松號

松木無聲風亦無適然相值兩相呼非金非石非絲竹  
萬頃雲濤殷五湖

池陂鄧店松林

破店誰相伴疎松對作行捲鱗乾不脫落子折猶香聲  
攪三更夢陰和片月涼吾廬萬株碧回首暮蒼蒼

嘗諸店酒醉吟二首

飲酒定不醉嘗酒方有味清濁與醇醅雜酌注愁肺偶  
爾遇真趣頽然得佳寐醒人作醉語語好終不類

我飲無定數一杯復一杯醉來我自止不須問樽罍白  
眼望青天青天為我開青天不開時我醉眠蒼苔

烟林曉望

一疊青松一疊烟橫鋪平野有無間真成萬丈鵝溪絹  
畫出江西秋曉山

也沒炊烟也沒雲日光烘起楚山氛却將重碧施輕素  
不見天工一筆痕

過土笕岡



水落初宜菜亭荒不復茅牛分义路口鶴立禿松梢秋  
熱方昇日朝涼更迴郊衰年走塵鞅何計返雲巢

曉風

曠暑遲旋旆新風急解紛白翻蕎處雪黃擺稻中雲動  
地休多怨披襟且一欣長松十里徑樹樹供清聞

晨炊旱塘

一歲官居守一州天將行役賜清游青山綠水留連客  
碧樹丹楓點綴秋夜夢晝思都是景左來右去不勝酬

我無韋偃丹青手只向囊中句裏收

進賢初食白菜因名之以水精菜云

新春雲子滑流匙更嚼冰蔬與雪蘄靈隱山前水精菜  
近來種子到江西

江西菜甲要霜栽逗到炎天搃不佳浪說水菰水蘆服  
硬根瘦葉似生柴

田家樂

稻穗堆場穀滿車家家雞犬更桑麻漫栽木槿成籬落

已得清陰又得花

道傍怪松

夾路長松去去幽一松竒怪獨凌秋  
兩枝垂地却翻上活是雙龍戲翠毬

過潤陂橋

潤陂初上板橋時欲入江東尚未知  
忽見橋心界牌子脚根一半出江西

却憶庚寅侍板輿過橋橋斷費人扶  
重來一見新橋了

淚濕秋風眼欲枯

歷覽溪中有底鳴蕭然蘆葉蓼花汀元來轎頂鳴鳴響  
將謂風聲是鴈聲

小憩揭家岡諦觀桐陰

仰看陽光只見空不如影裏看梧桐莫言日脚無行跡  
偷轉零分破寸中

宿花斜橋見雞冠花

出牆那得丈高雞只露紅冠隔錦衣却是吳兒工料事

會稽真箇不能啼

陳倉金碧夜雙斜一隻今棲紀消家別有飛來矮人國  
化成玉樹後庭花

小箬嶺望見靈山

青鞋紫陌倦黃埃送眼靈山一快哉碧玉熏爐天半立  
青蓮花萼霧中開宿雲準擬偷將去曉日殷勤喚出來  
欲琢新詩鑱絕壁梯空上去御風回

入玉山七里頭

諸村不雨數旬餘此地瀕江萬寶蘇晚紫豆花初總角  
早黃稻穗已長鬚回頭金步野谿遠當面玉山秋塢孤  
偶見年時解船處客愁依舊掛菰蒲

筠洪小路至餘干金步市初出官路

過玉山東三塘

筍輿拾得小涼天旋與開窗急捲簾十里輕雲閣秋日  
日光移在遠峰尖

遠峰隔水醒人心一半斜陽一半陰仙子更衣晚粧束  
紫茸領子翠毛衿

赤日中塗綠樹陰肯將碧繖借行人片雲忽在樹頭上  
失却勲勞庇得身

身行衢信兩中間夾路尖峰面面寒只道秋山似春笋  
不知春笋似秋山

縵車香裏過征衫白繭黃絲兩兩三不是秋風上饒路  
一生不信有冰蠶

金雞石在玉山東

相傳石裏兩金雞不記胡商鑿取時一隻遭擒一飛去

至今月落不曾啼

頭高尾下翠氍毹却恐相傳是妄談  
十七裡頭徐老店  
簷東道北北橋南

秋山

休道秋山索莫人四時各自一番新  
西風儘有東風手  
柿葉楓林別樣春

烏臼平生老染工錯將鐵皂作猩紅  
小楓一夜偷天酒  
却倩孤松掩醉容



宿查瀨

寒流一帶檻前橫落日諸峰霞外明  
水斷新洲添五里客尋舊路却重行  
江車自轉非人踏沙碓長春徹夜鳴  
疇昔穉桑今禿樹如何白髮不教生

拚楮江濱芙蓉一株發紅白二色走筆記之  
芙蓉照水弄嬌斜白白紅紅各一家  
近日司花出新巧一枝能著兩般花

司花手法我能知說破當知未大奇  
亂剪素羅裝一樹

略將數朶蘸燕支

過上湖額望招賢江南北山

遠山高絕近山低未必低山肯下伊定是遠山矜狡獪  
跳青湧碧角幽奇

額下看山似伏濤見人上額旋爭毫一登一陟一回顧  
我脚高時他更高

一水橫拖兩岸峰千痕萬折碧重重誰言老子經行處  
自在江山障子中

曉日秋山破格奇  
青紅明滅舞清漪  
畫工著色饒渠巧  
便有此容無此姿

觀田中鸛鵒啄粟  
因悟象畊鳥耘之說  
戲題  
烏衣縑布外無華  
白錦中單分外嘉  
只麼跳行人不覺  
忽然飛起自成花

粟黃蕎白未全秋  
誰報烏衣早作偷  
只在林梢築倉廩  
便知去處若為搜

衢州近城果園

未到衢州五里時果林一望蔽江湄黃柑綠橘深红柿  
樹樹無風縋脫枝

過三衢徐載叔採菊載酒夜酌走筆

征塗半月客塵黃今夕初逢一雨涼冷笑菊花堪計會  
為君八月作重陽

疾風動地雨傾荷一事商量君信麼試問糟床與簷溜  
雨聲何似酒聲多

浮石清曉放船遇雨

破曉開船船正行忽然頭上片雲生秋江得雨茶鼎沸  
怒點打篷荷葉鳴遠聽灘喧心欲碎近看浪戰眼初明  
夜來暗長前村水絕喜舟人好語聲

船過硯石步

雨中初厭翳篷遮撐起篷來景更佳岸上長松立如筆  
波中寒影走成蛇忽看雲外吐銀鏡一點晨光射玉沙  
却出船頭聊放目遠峰無數碧橫斜

下雞鳴山諸灘望柯山不見

地近蓮花江漸深一灘一過快人心  
貪看下水船如箭失却柯山無處尋

莫怯諸灘水怒號下灘不似上灘勞  
長年三老無多巧穩送驚湍只一篙

却憶歸舟是去年上灘渾似上青天  
諸灘知我懷餘怨急送秋風下水船

過章戴岸

山水教無暑牛羊報有村  
近沙經雨淨遠樹入烟昏  
奔

走何時了升沉未要論江鷗大自在雪影正孤翻  
港汊村村出江流節節添可憐千嶂好輸與一峰尖過  
雨日初軟順風波更恬旋褰篷作屋更掛簾為簾

江水

水色本正白積深自成綠江妃將底藥軟此千里玉詩  
人酒未醒快吸一川綠無物嚙清甘和露嚼野菊

晨炊泊楊村

沙步未多遠里名還異原對江穿野店各路入深村秋

水乘新汲春芽煮不渾舟中爭上岸竹裏有清樽

觀水歎二首

我方卧舟中仰讀淵明詩忽聞灘聲急起視惟恐遲八  
月濺飛雪清覽良獨竒好風從天來脩然吹我衣涼生  
固足樂氣變亦可悲眷然慨此水念我年少時迄今四  
十年往來幾東西此日順流下何日泝流歸出處未可  
必一笑姑置之

亂石厄江水要使水無路不知石愈密激得水彌怒回



風打別港勇往遮不住我舟歷諸灘閱盡水態度一聞  
一喜觀屢過屢驚顧不是見不多觀覽不足故舟中笑  
我癡癡點未易語

九月一日夜宿盈川市

下灘一日抵三程到得盈川已發更兩岸漁樵稍燈火  
滿江風露更波聲病身只合山間老半世長懷客裏情  
西畔大星如玉李伴人不睡向人明

舟過柴步寺

野寺隔疎樾遠舟見深殿獨逕通絕崖長縈度微線曩  
遊攜童弱攀岸已震眩前瞻足未到下窺意先轉朝來  
經雲根塵思起清羨野夫三二輩走過疾於箭俛仰二  
十年今老懷昔健

舟過青羊望橫山塢

莫問蘭溪雙隻牌青羊已見玉崔嵬去年辭了橫山塢  
不謂今年却再來

孤塢分明是故人一回一見一情親朝來走上山頭望

報道蘭溪酒恰新

過金臺望橫山塢

昨夜愁勤雨今朝喜嬾風  
金臺斜岸北玉塢正船東  
灘改呈新磧山回隱暗峰  
蘭溪水亭子作意定留儂

下橫山灘頭望金華山

篙師只管信船流不作前灘水石謀  
却被驚湍旋三轉  
倒將船尾作船頭

山思江情不負伊  
雨姿晴態揔成奇  
閉門覓句非詩法

只是征行自有詩

道是蘭溪水較寬  
蘭溪欲到怪生難  
後船只羨前船快  
不覺前船閣在灘

玉立金華霄漢間  
帝封天女錫仙山  
被他走下嚴灘去  
一水窮追竟不還

過橫山埕下

隔岸山迎我沿江  
柳拜人日搖秋水  
面波閃白龍鱗不  
遣船迷路俱從埕  
問津一生將玉鏡  
千古照金身

出橫山江口

白壁當江岸青旗定酒家  
斷崖侵屋窄細路入門斜  
縣近瞻雙堦洲橫隔一沙  
何須後來客始信此詩嘉

蘭溪雙堦

高堦無尖低堦尖一披錦袖一銀衫  
問渠何故終不語却倩灘聲替佛談

宿蘭溪水驛前三首

繫纜蘭溪岸開襟柳驛窻  
人爭趨夜市月自浴秋江  
燈

火疎還密帆檣隻更雙平生經此縣今夕駐孤幢

合眼波吹枕開篷月入船奇哉一江水寫此二更天剩  
欲酣清賞翻愁敗醉眠今宵懷昨夕雨卧萬峰前  
水色秋逾白山光夜不青一眉畫天月萬粟種江星小  
酌居然醉當風不覺醒誰家教兒子清誦隔踈櫺

過石塘

萬石中通一線流千盤百折過孤舟灘頭未下人猶笑  
下了灘頭始覺愁

烏祈酒

入到嚴州不識田一江兩岸萬青山烏祈酒味君休問  
費盡江波賣盡錢

毛永烏祈山兩崖家家酒肆向江開也知第一蒲萄色

只問米從何處來

毛永烏祈  
皆地名

過白沙竹枝歌

穹崖絕嶂入雲天烏鵲纔飛半壁間遠渚長汀草如積  
牛羊須上最高山

田畝渾無寸尺強真成水國更山鄉夾江黃去堤堤粟  
一望青來谷谷桑

絕憐山崦兩三家不種香杭只種麻畊徧沿堤鋤徧額  
都來能得幾生涯

東沿西泝浙江津去去來來暮復晨上岸牽檣推穉子  
隔船招手認鄉人

昨日下午灘風打頭羨他上水似輕鷗朝來上水帆都卸  
真箇輕鷗也自愁



絕壁臨江千尺餘上頭一徑過肩輿舟人仰看膽俱破  
為問行人知得無

過烏石大小二浪灘俗呼浪為郎因戲作竹枝歌二首

灘聲十里響千聲躍雪跳霜入眼奇記得年時上灘苦  
如今也有下灘時

小郎灘下大郎灘伯仲分司水府關誰為行媒教作贅  
大姑山與小姑山

過嚴州章村放歌

石崖削得瘦到筋半點也無塵土痕正如狡獪走得渴  
下赴江水一口吞嚴灘過却烏龍嘴兩岸秋山夾秋水  
舟中小酌亦不遑眼底生愁失蒼翠尖峰已自刺太虛  
峰頭更立玉浮圖好山千隻復萬隻家裏門前一隻無  
烏龍嘴  
亦灘名

晚過側溪山下

看山妙處幾曾知落照斜明始覺奇皺盡衣裳紋欲裂

爭先頭角遠相追松梢別放六峰出江底倒將千嶂垂  
一路詩篇渾漫興側溪端的不相虧

自嘲白鬚三首

強惜數莖鬚惟愁白却渠朝來都白盡愁惜兩何如  
客傳涅鬚法老子付一笑借令白再玄能令年再少  
涅鬚只誑客那可誑妻兒誑得妻兒著還能誑面皮

夜宿東渚放歌三首

前山欺我船兀兀結約江妃行小譚乘我船搖忽遠逃

見我船定還孤出老夫敢與山爭強受侮不可更禁當  
醉立船頭看到夕不知山於何許藏

看山須看山表裏不然看山還誤事平時只愛萬峰青  
落日惟存數尖紫浙江船上多少人往來看山誰識真  
丁寧舟人莫浪語却恐兒輩不肯去

天公要飽詩人眼生愁秋山太枯淡旋裁蜀錦展吳霞  
低低抹在秋山半須臾紅錦作翠紗機頭織出暮歸鴉  
暮鴉翠紗忽不見只見澄江淨如練

舟中夜坐

與月隔一簾去天爭半篷若無篷與簾身在太虛中

富陽曉望

江氛海霧暗前村四望秋空一白雲忽有數峰雲上出  
好山何故揔無根

楊村園戶栽芙蓉為塹一路幾數萬枝

楊村江上繞江園十里霜紅爛欲燃都種芙蓉作籬落  
真將錦繡裹山川晚粧照水密如積春色入秋寒更鮮

客舍瓶中兩三朶可憐向客強嬋娟

贈法才師

平江淨慧法才長老求予書壺天歸雲四大字  
因作四十字以問之

才公南華別不見八年許辨香宗混融隻眼半唐舉聊  
將笋蕨噉戲作冠劍語天還在壺中雲却歸何處

為崇辨法雲師作林野二大字

天下何人不愛官棄官出世古今難向來一覺釣天夢

便作林居野處看

跋徐恭仲省幹近詩

仰枕糟丘俯墨池  
左提大劍右毛錐  
朝蘭夕菊都餐却  
更斫生柴爛煮詩

君家詩伯老師川  
解道蘆花落釣船  
莫笑東湖秋水冷  
近來新吐一枝蓮

傳派傳宗我替羞  
作家各自一風流  
黃陳籬下休安腳  
陶謝行前更出頭

送顏幾聖龍學尚書出守泉州

聽履星辰北斗寒，三能只隔寸雲間。  
周家冢宰均四海，漢制尚書本百官。  
鵷鷺班齊瞻進步，鳳凰池近却飛還。  
河圖冠出西清上，莫作尋常五馬看。

用進退格

我昔綾衾下直時，公為璧水大宗師。  
清風明月行樂耳，布襪青鞋隨所之。  
顛倒壺觴留落日，翻騰山水入新詩。  
我來公去如相避，送眼行塵不得追。

寓仙林寺待班戲題



聽盡鐘魚半月聲  
浪傳移住竟何曾  
莫教少欠叢林債  
更作今宵且過僧

送殘秋

余七月間在高安郡治一夕夢至脩門外宿留  
旅邸問逆旅主人地名謂何答云送殘秋莫曉  
其意八月十二日拜召命是日奉檄啓行九月  
十二日入脩門寓仙林寺至十月三日奏事選  
德殿恭遇上賜睿旨和聖韻欽命竟送殘秋云

賜題殘秋和

聖韻游字

夢游帝里送殘秋重九真為帝里游  
十月初頭方賜對  
癡兒枉却一生愁

自跋江西道院集戲荅客問

問我來朝南內南便從花裏趨  
朝參新詩猶作江西集

為帶筠州刺史銜

時召命以筠  
州守臣奏事

客從南渡向儂來  
我馬西征拜此臺  
若問箇中何所有

一腔熱血和詩裁



誠齋集卷二十六